

Statistik penagihan berulang perlu diberi perhatian

Penyalahgunaan dadah semakin membarah dalam kalangan masyarakat Malaysia walaupun sepanjang tahun 2013, kes penagihan dadah menunjukkan penurunan sebanyak 12.77 peratus berbanding tahun 2012 yang membabitkan 9,015 orang.

Pada tahun 1983 kerajaan mendapati masalah dadah bukan lagi sekadar masalah sosial, tetapi mula dianggap ancaman kepada keselamatan negara. Justeru, Perdana Menteri pada waktu itu mengisytiharkan dadah sebagai musuh nombor satu negara ketika melan-

carkan Hari Antidadah Kebangsaan pada 19 Februari 1983.

655 penagih dadah setiap bulan

Mengikut Laporan Dadah Bulan Disember 2013 oleh Agensi Antidadah Kebangsaan, secara purata seramai 655 orang penagih dikesan setiap bulan dengan 397 orang daripadanya penagih baru dan 258 orang penagih berulang, secara puratanya, 22 penagih sehari.

Biarpun secara puratanya nampak sedikit penurunan berbanding tahun 2013, jumlah

penagih berulang mencecah sehingga 39.37 peratus, amat membimbangkan. Bukan jumlah yang menjadi ukuran, tetapi punca penagihan berulang itu yang merunsingkan.

Adakah pihak yang diberi tanggungjawab tidak menjalankan tugas dengan baik atau wujudnya faktor luaran yang menjadi pencetus? Penagihan berulang adalah masalah besar.

Pelatih hanya berada di dalam dunia mereka saja. Dikelilingi oleh rakan-rakan yang sama serta dibantu oleh orang yang sealiran dengan mereka. Cuma,

masyarakat setempat, malah keluarga sendiri tidak diberi suntikan motivasi dan persediaan

dalam menerima semula pelatih ke pangkuan keluarga. Malu dengan tohmahan masyarakat sekeliling membuatkan keluarga membuang jauh bekas penagih. Sokongan yang lemah dalam kalangan ahli keluarga serta stigma masyarakat terhadap bekas penagih memberi pengaruh yang tinggi kepada punca penagihan berulang.

Tiada sokongan kewangan kukuh

Bekas penagih yang tidak mendapat sokongan kewangan yang kukuh membuatkan mereka kembali kepada pekerjaan asal seperti mencuri dan melakukan jenayah yang besar sekali gus mendorong mereka untuk kembali ke lembah penagihan.

Secara umumnya, penagihan berulang didorong oleh tiga faktor yang disebut sebagai BOT (Barang, Orang dan Tempat). BOT menjadi punca

kepada penagih untuk kembali relaps. Atas bantuan rakan-rakan yang kononnya mahu membantu secara ikhlas, akhirnya menjerut leher mereka dan memaksa bekas penagih kembali ke kancap penagihan. Di sinilah peranan keluarga amat diperlukan. Jika keluarga awal-awal lagi sudah membuang jauh bekas penagih, kepada siapa lagi yang mereka perlu harapkan.

Isu penagihan berulang serta stigma masyarakat dan peranan keluarga bagi membantu pencegahan relaps akan dibincang pada Seminar Antarabangsa Pencegahan Dan Pemulihan Dadah 2014 anjuran Pusat Penyelidikan Dadah Asia, Universiti Sains Islam Malaysia. Seminar ini akan berlangsung pada 15-16 Oktober 2014 bertempat di USIM, Nilai, Negeri Sembilan. Maklumat lanjut boleh didapati di laman sesawang <http://bit.ly/prevent2014>